



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliorvm Omnivm Generalivm Et Provincialivm Collectio Regia**

Ab anno DLXXVII. ad annum DXC.

**Parisiis, 1644**

Rescriptvm Episcoporvm qui apud Guntramnum regem erant ad episcopos  
qui Pictauis Chrodioldem & reliquas monachas illi adhaerentes  
excommunicarant.

**urn:nbn:de:hbz:466:1-15221**

ANNO  
CHRISTI  
589.

*sua, cuius locum affectabat, imperium non ferens, cum Basina consobrina, Chilperici filia, & aliis amplius quadraginta puellis, quas in partes suas traxerat, monasterio egressa, Turonos ad Gregorium episcopum, inde ad Guntramnum regem in Burgundiam profecta est, multis ubique abbatissam conuiciis falsisque criminibus insectans. Post hæc cum sodalibus, quas Turonis reliquerat, Pictauos reuersa, beati Hilarii basilicam insedit, collectaque perditorum hominum manu, ibi se communiit, negans se ad monasterium nisi eiecta Leubonera redituram. Quin etiam cum ad eas Gundegisilus Burdigalensis metropolitani, cum Nicasio Engolismensi, Saffario Petragorico, & Maroueo Pictauiensi, ad monasterium reducere cupiens aduenisset, obstinatusque reluctantibus excommunicationem indiceret, sic in eos repente illa sicariorum turba grassata est, ut clericis sanguine respersis episcopi vix euaserint. Cum has ergo Gundegisilus, ut dictum est, a communione submonisset, epistolam ex suo fratrumque nomine conscripsit ad episcopos, qui tunc a Guntramno rege, ut hoc Chrodielidis cum abbatissa dissidium discuterent, erant aggregati. Sed epistolæ huius exemplar non extat. Rescriptum autem episcoporum apud Gregorium Turonensem libro IX. cap. XLI. est huiusmodi.*

# RESCRIPTVM EPISCOPORVM

qui apud Guntramnum regem erant ad episcopos  
qui Pictaui Chrodielidem & reliquas monachas  
illi adhærentes excommunicarant.

*Domnis semper suis atque apostolica sede dignissimis, Gundegisilo,  
Nicasio, & Saffario, Aetherius, Syagrius, Aunacharius,  
Hesychius, Agricola, Urbicus, Felix, Veranus, item  
Felix, & Berthramnus episcopi.*

**L**ITERAS vestræ beatitudinis quantum referante nuntio de vestra sospitate gauisi excepimus, tantum de iniuria quam vos pertulisse signastis, non modico mœrore adstringimur, dum & regula transcenditur, & nulla reuerentia religioni seruatur. Sed quia indicastis monachas, quæ de monasterio bonæ memoriæ Radegundis instigante diabolo fuerunt digressæ, quod nullam a vobis acquirerint correctionem audire, nec intra monasterii sui septa, de quo egressæ fuerant, voluissent reuerti: insuper basilicæ domni Hilarii per cædes vestras vestrorumque

Gregor.  
Tur. libro  
9. c. 41.

iniuriam intulisse. Quapropter ipsas a communionis gratia visi fueritis suspendere: ac per hoc nostram exinde mediocritatem elegistis consulere. Igitur quia optime vos nouimus statuta Canonum percurrisse, ac regulæ plenitudinem continere, vt qui in talibus excessibus videntur deprehendi, non solum excommunicatione, verum etiam poenitentiae satisfactione debeant coerceri: ea de re addentes cum venerationis cultu summæ audivitatis dilectionis instinctum, indicamus ea quæ definistis nos concordantes vestræ sententiæ consentire; quoadusque in synodali Concilio Kalendis Nouembris pariter positi debeamus consilio pari tractare, qualiter talium temeritas frenum districtiōis possit accipere, vt deinceps nulli liceat sub hunc lapsum faciente iactantia similia perpetrare. Attamen quia nos sua dictione domnus Paulus apostolus indefinenter videtur monere, vt opportune importuneque debeamus quoscumque credentes sedula prædicatione corrigere, & pietatem protestatur ad omnia utilem esse: ideo suggerimus, vt adhuc oratione assidua Domini misericordiā deprecemini, vt ipse spiritus compunctionis ipsas inflammare dignetur, vt id quod per delictum visæ sunt contraxisse, digna satisfactione poeniteant: vt in monasterio suo vestra prædicatione animæ, quæ quodammodo perierunt, propitio Christo reuertantur: vt ille qui vnam humeris illatam errantem ouem ad ouile reduxit, & de istarum transgressione, quasi acquisito gregi, congaudere dignetur: hoc specialius postulantes, vt pro nobis intercessionum vestrarum suffragia indefinenter, vt confidimus, tribuatis.

## SUBSCRIPTIONES.

Peculiaris vester Ætherius peccator salutare præsumo.  
 Cliens vester Hesychius reuerenter audeo salutare.  
 Amator vester Syagrius reuerenter saluto.  
 Cultor vester Vrbicus peccator famulanter saluto.  
 Venerator vester Veranus episcopus reuerenter saluto.  
 Famulus vester Felix salutare præsumo.  
 Humilis vester atque amator Felix audeo salutare.  
 Humilis atque obediens vester Berthramnus episcopus audeo salutare.

NOTA